

# INUIT ATAQATIGIIT

## INATSISARTUNI



30. juni 2014

Inatsisartut Suleriaasianni § 37 naapertorlugu innuttaasut peqataatinneqartarnerat aammalu maalaaruteqarsinnaatitaanerit pillugit Naalakkersuisunut imaattunik apeqquteqarpunga.

(Inatsisartunut ilaasortaq Naaja H. Nathanielsen, Inuit Ataqatigiit)

### Apeqqutit:

1.

**Århusip Universitetiata quppersagaa naapertorlugu Århusimi isumaqatigiissummut atatillugu misissuineq 18. maj naammassivoq.<sup>1</sup> Taamaasilluni nalunaarutip imarisaani immikkoortoq 151, 20. maj-imi siullermeertumik oqaluuserineqarmat, Naalakkersuisunit ilisimaneqareersimassaaq. Suna pillugu taava immikkoortup oqaluuserineqarnerani tamanna eqqaaneqanngila? Kalaallisuunngortinnerata qaqugu piareernissaa naatsorsuutigineqarpa?**

2.

**Immikkoortoq 151-imut akissummi innuttaasut soqutigisaqatigiittullu kattuffiit Aatsitassanut inatsimmi ingerlatseriaatsitigut aalajangikkanut maalaarsinnaatitaanerit erseqqissarneqarpoq. Akissutilli saqqummiunneqarneraniit sapaatit akunneri arlalinnguit qaangiutiinnartullu maalaaruteqarsinnaatitaanerup peerneqarnissaanut inatsimmi allannguutissamut tusarniaassut Naalakkersuisut nas-siuppaat<sup>2</sup>. Naalakkersuisut pisami isummaminnik allanngortitsigamik imaluunniit Avatangiisinut Pinngortitamullu Naalakkersuisoq Inuussutissarsiornermut Aatsitassaqarnermullu Naalakkersuisup maalaaruteqarsinnaatitaanermik atorunnaarsitsinialeersaarneranik ilisimasaqarsimanngila?**

3.

**Inuussutissarsiornermut Aatsitassaqarnermullu Naalakkersuisup aatsitassanut inatsimmi maalaarsinnaatitaanerup peernalersaarneranik qanga qanorlu Naalakkersuisut sinnerinut ilisimatitsiva?**

### Tunngavilersuut:

Upernaami ataatsimiinnermi Inatsisartuni ilaasortaq Sara Olsvig Kalaallit Nunaata Århusimi isumaqatigiissut (imm. 151) ilannguffigissagaa siunnersuuteqarpoq. Siunnersuuteqarnermi innuttaasut paasisutissanik pissarsisinnaanermikkut, aalangiiniarnerni peqataatinneqarnermikkut, maalaaruteqarsinnaatitaanermikkut avatangiisinullu tunngasutigut eqqartuus-sivikkoortitsisinnaanermikkut ersarissunik malittarisassaqtinnissaat qulakkearniarneqarpoq.

Siunnersuut 20. maj siullermeerneqarpoq 5. junilu aappasaaneerneqarluni.

---

Naalakkersuisut naalakkersuisooqataasullu sinneri siunnersuummik itigartitsipput. Avatangiisinut Pinngortitamullu Naalakkersuisoq siunnersuummut ilaatigut ima akissuteqarpoq.<sup>3</sup>

*"Innuttaasut avatangiisinut pisinnaatitaaffii, paasissutissiisarneq peqataatitsisarnissarlu suliassaqarfiupput Naalakkersuisunit annertuumik pingaartinneqartut".*

*"Naalakkersuisut isumaqarput, Aarhusimi isumaqatigiisummi siunnerfiit pingaarnert avatangiisinut inatsimmut atuuttumut ilaatinneqareersut (...). Aatsitassanut suliassaqarfimmut tunngatillugu Aatsitassanut ikummatissanullu inatsimmi innuttaasut avatangiisit pillugit paasissutissanik pissarsisinnaaneratt pillugu immikkut ittunik aalajangersagaqarpoq (...) aammalu innuttaasut soqutigisaqatigiiffiillu pisortat ingerlatsineranni aalajangiinerit pillugit maalaaruteqarsinnaanerannut aalajangersakkani immikkut ittuni allassimavoq.*

*"Taamaattumik Avatangiisinut Pinngortitamullu Naalakkersuisoqarfik Aarhus Universitet suleqatigalugu Aarhusimi isumaqatigiisummut naleqqiullugu, suliassaqarfiit oqartussaasullu assigiinngitsut akimorlugit, inatsisini maannakkut atuuttuni killiffinnik misissuinermik aallartitsivoq. Isumaqatigiisut sumut tunngasortai atuutsinneqalersimanersut, kiisalu suut atuutsinneqannginersut paasiniarneqarnissaa misissuinermi siunertarineqarpoq. Isumaga malillugu misissuineq naammassippat nalilersorneqareerpallu misissuinerup inernerisa Inatsisartuni Eqqissisimatitsinermut Avatangiisinullu Ataatsimiititaliamut saqqummiunneqarnissaannut oqaloqateqarnissamullu periarfissaqarnissara pitsaassaaq, tassani isumaqatigiisutip atuutsinneqalernerani iluaqutissartaasut akornutissartaasullu ataatsimut paasiluarneqarneqarnissaat Naalakkersuisunit anguniarneqassalluni."*

Paasissutissat nutaat ersersippaat immikkoortup oqaluuserineqarnerani Inatsisartut paasissutissanik nutartikkanik Naalakkersuisunit paasitinneqarsimanngitsut, Naalakkersuisullu immikkoortup oqaluuserineqarneraniit Aarhusimi isumaqatigiisummut atatillugu politikiminnik allannortitsisimasut erserpoq.

Apeqqutima tamakkerlutik ullut suliffiusut qulit iluanni akeqarneqarnissaat qinnutigissavara.

---

<sup>1</sup> <http://pure.au.dk/portal/da/projects/vurdering-af-den-gældende-groenlandske-lovgivning-i-lyset-af-de-krav-der-foelger-af-aarhuskonventionen%2861b1cda9-44b1-4402-8dd9-7e69a1444f89%29.html>

<sup>2</sup>[http://naalakkersuisut.gl/da/H%C3%B8ringer/Arkiv-over-h%C3%B8ringer/2014/Forslag\\_aendring\\_raastofloven](http://naalakkersuisut.gl/da/H%C3%B8ringer/Arkiv-over-h%C3%B8ringer/2014/Forslag_aendring_raastofloven)

<sup>3</sup>[http://inatsisartut.gl/dvd/FM2014/pdf/media/1806802/pkt151\\_fm2014\\_bf\\_aarhuskonvention\\_sn\\_1beh\\_dk.pdf](http://inatsisartut.gl/dvd/FM2014/pdf/media/1806802/pkt151_fm2014_bf_aarhuskonvention_sn_1beh_dk.pdf)